

# Consillu Armânjloru

(Consillu Makedonarmânjloru)

[www.makedonarman-council.org](http://www.makedonarman-council.org) e-mail : [info@makedonarman-council.org](mailto:info@makedonarman-council.org)

## Bulitinu Infurmativu

Kiro di dauâ dzâli, tu 4-li sh 5-li di Agustu 2012, tu câsâbălu armânescu Crushuva ditu Ripublica Makidunia – câsâbă thimiljiusitu aoa sh-cama di daua suti di anji di strâpâpânjli Armânjloru cari tu bitisita a etâljei 18, dupu tsi fu apreasă Muscupolea, câftarâ sh-aflarâ aestu locu uidisitu – s-dirvâti

### *Marea Andamusi a Armânjloru di Iutsido*

Aestâ andamusi di Crushuva, andreaptâ di Liga Armânjloru ditu R. Makidunia, una di-atseali tsintsi sutsati / fari armâneshtsâ cari aoa sh-shapti anji thimiljiusirâ Consillu a Makedon-Armânjloru, fu unu izvuru di dukeari safi armâneascâ, ashi cumu fu sh-prota Mari Andamusi a Armânjloru di Iutsido di aoa sh-doi anji ditu loclu di isturii sh-culturâ armâneascâ ahândoasâ, Muscupolea / Arbinishii.

Andamusea di Crushuva, fu diznău unâ furnjii ca Armânjilji sâ-sh spunâ yilia a banâljei a loru, sâ s-aspunâ la tuts alantsâ anamisa di cari bâneadzâ câ nica suntu tu banâ sh-câ au vrearea – cu sinidhisea trâ cultura, limba sh-adetsli a loru – sâ spunâ câ suntu parti di idyiulu populu, a s-hibâ câ bâneadzâ mpârtsâts tu craturli natsiunali ditu Balcanu, trâ a curi thimiljiuseari virsarâ multu sândzâ.

Muabetsli trâ andridzearea alushtuii iventu s-purtarâ prota oarâ aoa sh-unu anu, tu meslu Brumaru 2011, la andamusea CMA di Skopia. Apofasea ta sâ s-tsânâ aestâ andamusi s-ari loatâ tu Adunarea Ghenerala CMA di estanu tsi s-dizvârti Tirana tu ishita di meslu Martsu. Consillu a Makedon-Armânjloru (CMA), pritu bulitini infurmativi, infurmă massmedia armâneascâ trâ andamusea di Crushuva sh-ari pitricutâ acljimări câta sutsatili armâneshtsâ di iutsido deadunu cu pruyrama cumu va s-dizvârteascâ aestâ andamusi.

“Njiurizma” a sârbâtoariljei ahurhi nica di Viniri cându Armânji, yinits di iutsido, dukimâsirâ s-umplâ hotelurli sh-mushatili casi armâneshtsâ di Crushuva cari cathi anu ashteaptâ uaspits tsi yinu s-discurmâ tu aestâ musheata hâvai aleaptâ di Armânjli tsi aoa sh-cama di dauâ suti di anji ahurhirâ s-thimiljiuseascâ aestu câsâbă ditu muntî.

# Consillu Armânjloru

(Consillu Makedonarmânjloru)

[www.makedonarman-council.org](http://www.makedonarman-council.org) e-mail : [info@makedonarman-council.org](mailto:info@makedonarman-council.org)

Sâmbâtâ, tu 4-li di Agustu, ahurhinda cu oara tsintsi dupu prândzu, Armânjilji tsi umplurâ sala di conferentsi di la hotellu “Montana” avurâ haraua s-ascultâ kiro di trei sihâts cumâts ditu isturia a câsâbălui Crushuva, di Ribilipsearea di la 1903, ti contributa Armânjloru la thimiljiusearea a craturloru natsiunali ditu Balcanu, pârâstisiti di profesori universitari ditu craturli ditu Balcanu iu bâneadzâ Armânjilji. Tuti materialili tsi furâ pârâstisiti tu aestu simpoziu va hibâ adunati tu unâ carti tsi va s-alânceascâ tu yinatorlu aprukeatu.

Dumânicâ, dupâ dyeavasea pi limba armâneascâ di la bâsearica “Ayi Yiani”, s-dizvâli ploacea alâkitâ pi murlu ali bâsearicâ di organidzatorlji alishte andamusi, unu semnu di tinjii ti atselji Armânji cari cu pârâdzlji a loru mutarâ aestâ bâsearicâ, ahurhitâ la anlu 1897 sh-bitisitâ 1903, tu alu a ribilipseariljei.

Unu idyiu semnu di tinjii sh-thimiseari, minduitu di organidzatori, fu alâkitu pi murmintulu alu Pitu Guli, heroulu Armânu tu Ribilipsearea di aoa sh 109 anji tsi s-alumtâ trâ unâ ripublicâ iu tuti miletsli s-aibâ idyili ndrepturi.

Tu plateia di Crushuva, aclo iu s-ari virsatâ multu sândzâ tu minarea di Crushuva, tora umplutâ cu suti di Armânji duruts yinits di iutsido sh-cari nu furâ cârtits di câroarea tsi lj-apitrusi soarli di veârâ, tu oara di prândzu, ahurhi s-dizvâteascâ Andamusea di Crushuva cu zborlu di la balcone ditu platei di iu s-avdzâ atsea tsi s-dimândâ aoa sh 109 anji, tu atselu anu di ribilipseari.

Zboarâ di ghinueari shi shcurti pârâstiseri trâ catandasea armâneascâ tu craturli ditu Balcanu iu bâneadzâ Armânjilji s-avdzârâ di la prezidentulu a comisiuniljei di organidzari, prezidentulu CMA, zboru di la cathi farâ armâneascâ ditu craturli ditu Balcanu, membri tu Consillu a Makedon-Armânjloru. Fu dyivâsitâ sh-telegrama aprukeatâ di la pzeidentulu ali R. Makidunia, Dr. Georgi Ivanov, cata cumu sh-alti dimândări / aurâciunji aprukeati di la sutsati armâneshtsâ tsi nu puturâ s-ljia parti la aestâ andamusi.

Trâ Armânji tsi tu bana a loru cilâstâsirâ multu shi s-alumtarâ niacumtinatu trâ prublimatica armâneascâ, furâ dhurusiti plaketi di tinjii.

Hâbări cama multi di la aestâ andamusi va hibâ dimândati di massmediili armâneshtsâ tsi filmarâ aestu iventu.

Ninti s-ahurheascâ pruyrama culturalâ fu aprukeatâ “Dimândarea di Crushuva” tsi poati s-hibâ dyivâsitâ ma-nghiosu.

Consillu Makedon-Armânjloru  
Biroulu di Cumândâseari

tu 06-li di Agustu, 2012

# Consillu Armânjloru

(Consillu Makedonarmânjloru)

[www.makedonarman-council.org](http://www.makedonarman-council.org) e-mail : [info@makedonarman-council.org](mailto:info@makedonarman-council.org)

## ANDAMUSEA ARMÂNEASCĂ DI CRUSHUVA 5-li di Agustu 2012, CRUSHUVA / RIPUBLICA MAKIDUNIA

**Noi,**

**Armânjilji / Makedon-Armânjilji** ditu tuti craturli iu bânămu, tsi himu adzâ la aestâ Andamusi Armâneascâ di Crushuva / R. Makidunia, cāsâbă thimiljiusitu di strâpâpânjilji-a noshtsâ,

**Luyursindalui câ Armânjilji / Makedon-Armânjilji** – atselji di nai ma veclji tu aesti locuri ditu Balcanu – di daima furâ cândâsits câ tuti etniili cu cari bâneadzâ deadunu, fârâ s-hibâ loati tu isapi limba, buiaua politicâ icâ di pisti, s-aibâ idyili-ndrepturi,

**Cara s-minduimu** câ anamisa di vecljili populi evropeani, autohtonji tu Balcanu, Armânjilji / Makedon-Armânjilji – cu a loru sinidhisi ti cultura, limba, adetsli sh-pistea tsi lâ da vrearea sâ s-aspunâ tu lumi câ facu parti ditu idyiulu populu – suntu unâ paradhiymâ di banâ deadunu cu alanti populi,

**Mutrindalui** tuti atseali nomuri evropeani sh- internatsiunali – Conventsiunea Evropeanâ ti Ndrepturli a Uomlui (1950), Conventsiunea ONU andicra di Ndrepturli Tsivili sh-Polititsi (1966), Conventsiunea-Cadru trâ Avigljarea a Minoritâtsloru Natsiunali (1994), Carta Evropeanâ a Limbilor Reghiunali icâ Minoritari (1992) – tsi furâ aprukeati maxus ta sâ aveaglji atseali populi fuvirsiti cari s-aflâ tu idyia catandasi tu cari s-aflâ sh-popullu Armân,

# Consillu Armânjloru

## (Consillu Makedonarmânjloru)

[www.makedonarman-council.org](http://www.makedonarman-council.org) e-mail : [info@makedonarman-council.org](mailto:info@makedonarman-council.org)

**Ti tuti aesti itii, Consillu a Makedon-Armânjloru apufuseashti aestâ**

### **DIMÂNDARI**

- **Consillu Makedon-Armânjloru** caftâ la tuti craturli ditu Balcanu, iu bâneadzâ Armânjilji (Arbinishia, Gârtsia, Rumânia, Ripublica Makidunia, Sârbia, Vâryâria), ca tuti institutsiunli tsi au borgi tu dumenea ti ndrepturli a uomlui s-cilâstiseascâ trâ avigljearea a yishteriloru shi a identitatiljei etnicâ, culturalâ, lingvisticâ shi di pisti a Armânjloru.
- **Consillu Makedon-Armânjloru** caftâ la tuti craturli ditu Balcanu, iu bâneadzâ Armânjilji, s-asiyuripseascâ ndrepturli tsi lâ si pricadu Armânjloru ca populu reghionalu, acshi cumu u spunu nomurli evropeani sh-internatsiunali trâ populi fârâ „kin state”.
- **Consillu Makedon-Armânjloru** caftâ la guvernulu ditu Ripublica Makidunia – singurlu cratu ditu Balcanu iu Armânjilji suntu pricânâscuts tu Cunstitutsiuni, ama tu factu lipseashti s-da nica ma mări eforturi ta s-implementeadzâ ndrepturli cari lâ suntu garantati tu Constitutsiuni sh-cari dealihea s-lâ asiyuripseascâ developarea a limbâljei sh-a culturâljei a loru – unu dialogu dishchljisu trâ unâ cama bunâ cooperari / lucru deadunu anamisa di Armânami sh-institutsiunli ditu aestu cratu tsi au borgea s-andrupascâ popullu Armân pritu proyrami minduiti deadunu.
- **Consillu Makedon-Armânjloru** caftâ unu dialogu dishchljisu, dimocraticu, cu tuti guvernili a craturiloru balcanitsi, iu bâneadzâ Armânjilji, tra sâ s-aflâ cäljiurli trâ yinitorlu a limbâljei sh-a culturâljei armâneascâ, va s-dzâcâ bâgarea a limbâljei tu sculii, mass-media shi bâsearicâ.
- **Consillu Makedon-Armânjloru** caftâ la tuti guvernili ditu Balcanu, iu bâneadzâ Armânjilji, s-aproaki tu Constitutsiuni unu nomu cari s-aveaglji cultura sh-limba armâneascâ ca parti di patrimonu natsiunalu a cratlui, acshi cumu s-adrâ tu Frântsii cu yishtearea culturalâ a Bretonjloru, Provensaliloru, Catalanjloru etc.

# Consillu Armânjloru

(Consillu Makedonarmânjiloru)

[www.makedonarman-council.org](http://www.makedonarman-council.org) e-mail : [info@makedonarman-council.org](mailto:info@makedonarman-council.org)

Tuti aesti câftări au tu scupo s-nu kearâ Armânjli ca populu ahoryea, populu cu a lui culturâ avutâ, limbâ sh-adets shi s-nu hibâ factoru di destabilidzari, ma s-hibâ factoru di integrari shi stabilidzari, ashi cum eara sh-pânâ tora.

Dimândari apufusitâ adzâ, 5-li di Agustu 2012, Crushuva / R. Makidunia, cu furnjia ali Andamusea Armâneascâ.

tu 5-li di Agustu 2012 / Crushuva, R. Makidunia

(Bulitinu Infurmativu Nr. 36)



Council of  
Macedonarmans

# *Consillu Armânjloru*

*(Consillu Makedonarmânjloru)*

[www.makedonarman-council.org](http://www.makedonarman-council.org) e-mail : [info@makedonarman-council.org](mailto:info@makedonarman-council.org)